


PL
2463
Z6C58
V. 5





駁呂留良四書講義

下論

子曰先進於禮樂章

呂留良云前輩後輩止說今昔耳故曰於禮樂若謂禮樂分先後進則是禮樂之先進後進矣

詞意含糊乍看幾不知其所謂及細按之乃知留良欲描於字口氣耳其實先進後進之於禮樂與用禮樂之先進後進有何差別理既可通又無上下文之關礙何苦設難端以困學者使塾師晚學窮日夜淹歲月以爭一二字無關義理之虛神何暇窮理通經此等講說誤

人不淺

呂留良云論者輒以上節不贊先進不貶後進下節不補不從後進以爲妙欲周旋時人反與孔子作頭抵不亦異乎

下節夫子明說從先進則不從後進明矣周旋後進誠爲不必至上節野人也君子也夫子原是述時人之語此處且不贊先進不貶後進留待下節發明有何不是留良一槩痛詆多見其心粗耳

呂留良云野人君子二句乃時人之言此二句尚須活放未可直入時人口中

野人也君子也此二句正須提清是時人之評方有著

落不然。却似夫子自作反面之詞。無此理也。留良乃云。尚須活放。不可直入時人口中。然則當於何處入時人口中耶。此又留良多設難端。以疑誤初學也。

呂留良云。縉紳富室。不知儉德。爲避轉相效慕。

易君子以儉德避難。削去難字。加一爲字。割裂經文。使人不解。且易經本義。非言用度奢儉。留良引此。以黜奢侈之非。失其旨矣。

季路問事鬼神章

呂留良云。事鬼之道。卽在事人之中。此聖人教學者用力。只在日用平實處。而其道無所不達也。若泥定

言
在事鬼中講出事人之理以求其合一則雖謂
未能事鬼焉能事人亦可矣此似是而非也

孔子所以言未能事人焉能事鬼者以其理本合一也
留良乃以於事鬼中講出事人之理以求其合一者爲
似是而非果如所云則必別有事鬼之理出於事人之
理之外而後可也以祭祀之精意言之仁人享帝其所
以對越在天者卽平日民胞物與至誠惻怛之心故能
昭假於上帝也孝子享親其所以致愛致慤僾見愾聞
者卽平日之視於無形聽於無聲故能無怨恫於神明
也以祭祀之節文言之祭統所謂見君臣之義見父子

之倫。見貴賤之等。見親疏之殺。見爵賞之施。見夫婦之別。見政事之均。見長幼之序。見上下之際。凡所以交於神明者。莫非身世相接。切實之道。果能於事鬼中講出事人之理。是深明經義也。留良乃以未能事鬼焉能事人折之。是文致其罪。而未察於義理之實也。不亦枉乎。註云。學不可躐等。謂舍事人而求事鬼。勢必穿鑿矯誣。無所依據。非以事鬼事人爲二。必先從事於事人。而後徐及於事鬼也。故復引程子之說。以明合一之義。留良不會註意。而以求合一爲非。失之遠矣。

季氏富於周公章

呂留良云冉有政事之才長於理財爲季氏宰則竭其知能爲之謀富足以爲盡其職分不道此却是聚斂附益也聚斂附益不特冉有無此四字在意中卽外人亦未必以此相稱是記者因聖人之意而勘斷之故上面先提季氏富於周公句見若季氏不富冉有所爲未到此重罪也故冉有之罪從不知大義呆老實做官得來

天之生財止有此數冉子爲宰而賦粟倍他日其必有不當取而取者可知矣留良乃以冉子長於理財盡其職分爲聚斂附益然則孔子之爲委吏乘田必曰會計當牛羊遂亦可謂近於聚斂附益乎謂冉子之罪在不

知大義。呆實做官。然則知大義者。將別有詭計詐術乎。
以仕於季氏。責冉子之不知大義可也。既仕焉。而以呆
實做官爲冉子罪。則冉子不任受矣。

柴也愚章

呂留良云四字好處。病處都有。聖人造就人材於此。
亦可見非徒作索瘢求類語也。然數子終於此病而
曾子竟以魯得之。可見人不能無
氣質之偏。顧其變化之何如耳。

朱子曰。曾子只緣魯鈍。被他不肯放過。所以做得透。若
是放過。只是魯而已。又曰。參也竟以魯得之。只是不肯
放過。留良之說。實本於此。然因此而直斷諸子之終於

此病。則恣且誣矣。觀子張見危授命。執德不弘。二章語。切實深厚。則非終於辟者也。觀禮記所載。子羔將爲成宰。成人聞之。乃爲其兄衰。與所論買道而葬之語。與春秋傳孔子曰。柴也其來之事。則亦非終於愚者也。子路忠信著於天下。鄰國信其一言。徒嘑而能然耶。

子張問善人之道章

呂留良云。不踐
正是不入處

不踐迹。是善人好處。所謂天然合道也。若有此美質。而加之以學。則其入室也。比他人爲易矣。何留良反以此

爲善人病耶。蓋此二句一揚一抑。而留良必欲作一串語氣。是以謬戾至此耳。

呂留良云。子張只問善人一種究竟。故夫子云云。不入室。是終於不入。故曰善人若謂不可限量。則不得僅名之善人矣。論二句語氣。則上句揚。下句抑。其實下句病痛正在不踐迹句中。抑揚並到。但有下句在。露不出抑底語氣耳。須將踐迹說好一步。則揚善人處。抑意已透矣。

觀此。乃知留良受病之所在矣。蓋善人之不踐迹。是未曾學問。不知有所謂迹者而踐之耳。故朱子謂質美而未學。張子謂欲仁而未志於學。玩兩未字。可知非謂爲善人者。限定終於不學也。留良誤以爲善人者。限定終

於不學。所以有不入室是終於不入之說。豈知夫子此
二句。只論眼前之善人。亦不定後來如何。觀孟子答浩
生不害。自善人而進於信人。以至爲美爲大爲聖爲神。
可見善人知學時。後面自有許多進德地步。留良乃謂
子張是問善人究竟。夫子云不入室是終於不入。何其
懵懵耶。至謂下句病痛。正在不踐迹句中。是謂善人雖
知有古人之迹而不肯踐也。果爾。則任心蔑古。病痛甚
大。亦不足以爲善人矣。

呂留良云善人原是正道中一等
不入室正見善人光明不欺處

室訓精微之奧。蓋聖道之極致。非義精仁熟不足以幾此。善人於此境界。相去甚遠。然聖人之教。總是引人向上。學必至於入室。方爲善學。此聖人之於善人。所以不滿之而又深望之也。今謂不入室。正見善人光明不欺處。然則美質之人。皆可畫地自限。不圖進修。有此理哉。

呂留良云。善人之道。不過問善人之名義云何耳。非善人自有一道。與聖賢之道分大小也。如問小人之道。惡人之道。俱可。若皆與聖賢之道比較。則無人不。是道矣。今人拈道字多。謬要之說。善人便是說善人之道。非善人者。其姓名而別有其道也。

朱子曰。善人之道。只是箇善人底道理。留良云。不過問

善人之名義。字義亦非。

呂留良云。不但不踐。有抑揚。并踐迹。亦有抑揚。不但踐字。有抑揚。卽迹字。原有抑揚之理。在要看得圓透。此章抑揚之旨。只以不踐迹爲揚。不入室爲抑耳。如留良所推廣許多抑揚。皆此章之旨所無也。今更就其言而一一剖之。其云不踐中有抑揚者。如惡人不師古而行不善事。善人不師古而天然合道。此不踐之抑揚也。其云踐迹中有抑揚者。如初學者勉行而未能中節。久學者習慣而動若自然。此踐迹之抑揚也。此二者雖有抑揚之理。然於此章之義。已風馬牛不相涉矣。至云卽

迹字原有抑揚之理在。則一毫不可通矣。夫此所謂迹者。乃前言徃行。載之於經。垂爲訓典。在踐之者有淺深離合。在迹則一定而不可易。又何抑揚之有。留良此等議論。信口指注。使人茫洋迷亂。不知所適。亦誕矣哉。

子路問聞斯行諸章

呂留良云。昔程子見謝上蔡。謂此秀才展拓得開。大都人只坐展拓不開。則頭重齒豁。仍守故步耳。夫子此節是爲由求各更展一步也。若謂損由之多。以益求。增求之少。以擬由。則是斷鶴脰。續鳧脚。將使二子共成一樣不尷尬東西而後已。耶。此聖人所以痛絕夫鄉愿也。

夫子之進退由求。教二子以中道。固非使子路學冉有。

使冉有學子路也。然即使二子者互相師資亦何害其爲損有餘補不足之工夫。比之守一轍而不變者不猶愈乎。如之何便成不脛脛東西也。若謂德不遠相過者不可相學。則如子路問成人。而夫子告以武仲公綽卞莊冉求等。此數人者皆不及子路。而夫子舉之何也。如留良之說。必須進者一於進。退者一於退。自成一路。方不爲不脛脛東西。而免於鄉愿。不幾與此章之本旨相背而馳乎。又莊子鳧脛雖短。續之則憂。鶴脛雖長。斷之則悲。脛可言短。脚不可言短也。其用字之不典如此。

季子然問仲由冉求章

呂留良云道只是一道行道處有不同卽道之時中易傳謂有正而不中無中而不正非二道也若隨地而變則馮道劉穆之皆可以爲合道乎只爲後世錯看一權字如曹操之篡漢馮道之喪心李贊皆以爲活佛聖人矣

道之本雖一。然其散在事物者。一事一物。各有當然之則。是道有不同。所以行道者。亦隨之而不同也。孟子曰。三子者不同道。此道有不同之明驗也。今云道只一道。行道處有不同。此豈知道之言耶。夫道一。則行之者亦一矣。行有不同。則道之本有不同可知矣。判道與行爲

言
二道自道而行自行。如之何其可也。易傳謂有正而不中者。謂人有守經據法。而不適事理之當然者。是有正而不中也。謂無中而不正者。謂人苟能因時制宜。無過不及。則自合於一定之理。是無中而不正也。此二句之義。正以理無定在。欲人隨事以適中。而留良引以爲無二道之証。不與易傳之本意大相悖乎。且隨地而變。正道之妙用。而所貴於精義之學也。顏子居於陋巷。禹稷出而濟時。曾子賓師而避寇。子思爲臣而守節。孟子受宋薛之餽。而於齊則不受。皆隨地而變者也。否則膠柱

而鼓瑟。如之何其可哉。留良乃謂隨地而變。卽馮道穆之之流。何引喻之失義。一至於此。留良肆口嫚罵。語無倫次。要之與此章之旨。總無干涉也。

顏淵問仁章

呂留良云。已與禮原自仁中分出。到得克復了。只有一仁也。不是克復外別見箇仁。只是到此時纔見得所克復底便是。

曰。禮自仁分出可也。已乃私欲。謂私欲自仁分出可乎。蓋已與禮皆自心分出。所謂道心禮也。所謂人心已也。以爲自仁分出。則悖矣。胡五峰云。天理人欲。同體異用。

朱子曰。如此說。却是體中亦有人欲。觀朱子不許五峰之說。則留良所云。正顯與朱子悖也。又云。到此時纔見得所克復底便是。語亦有病。謂所復之禮卽仁。可也。謂所克之已卽仁。可乎。

呂留良云。朱子講發動時固用克。未發時須致其精明。始得。蓋未發之精明。知居多而發時之勇決行居多。近人有主發時下手說。體朱子索性克去之意。故專主行邊。顏子有不善未嘗不知。知之未嘗復行。此其所以不遠復也。紅爐點雪。雪消處是行。所以爲紅爐。是如何。

已發未發俱兼知行。已發之知行。謂遇事接物時。至明以察其幾。是知。至健以致其決。是行也。未發時雖未有

所知所行之事。然兼包知行之理在內。如朱子言未發時致其精明。未發之中。惺惺不昧處。是知之根。其謹惕不放逸處。亦是行之根也。以未發屬知。已發屬行。從來無此說。留良又引顏子有不善未嘗不知。知之未嘗復行。以爲証。殊不知此皆已發上之知行。不可混入未發內也。朱子所謂未發致其精明。乃主敬工夫。所以有不善能知。知之便能不行。其根實由於此。

呂留良云。自大賢以下。卽不能無私欲之累。故必須從克已下手。到已私克勝。而天則尚有未合。則須於復禮着力。然至此境者甚少。而其功亦至精。不似克已工夫艱重。無人不當由此道也。

克已復禮。不是兩時事。朱子或問中。謂克已時。以禮爲則。是也。今按下節。非禮勿視四句。正發明克已復禮工夫。蓋當視聽時。便有當視當聽之則。所謂禮也。而奸聲亂色。或留聰明者。已害之也。克已者。於非禮處。勿視聽。則所視聽者。皆禮矣。二者如手反覆。無兩時。無兩事。今留良云。從克已下手。到已私克勝。而天則尚有未合。然後復禮上用工。如此。則是當其克已時。不辨是非。茫無主宰。而惟決去爲務。不虛費此一塲辛苦耶。且所貴乎聖賢之學者。爲其卽事循理。卽物體道也。若克已復禮。

判爲兩層工夫。則當既克己之後。未復禮之前。空蕩其心。所作所爲。毫無準則。到復禮時。然後一一收拾也。天下有此聖學哉。

仲弓問仁章

呂留良云。顏子本原不動。但微有感湊未淨。只須決去。便無事。仲弓病痛似輕。而本原不足。虛邪深痼。故必當峻補。出門四語。是仲弓峻補方也。

朱子曰。譬如服藥。克己者。要一服便見效。敬恕者。漸漸服藥。磨去其病。所謂一服見效者。喻用力之猛毅。所謂漸漸服藥。磨去其病者。喻持養之謹密。乃因二子天資

之異。而示以進德之方。非謂二子各有其病症也。如以病症言。則所謂虛邪深痼者。乃梏亡反覆以後之病症。以語中人尚不可。而可以。是誣聖門大賢以德行著稱者乎。

呂留良云。人心中只有一仁。何處着敬恕名目。只爲私欲所間隔。則此心放失而不存。便與仁體日遠耳。敬恕所以去私欲。以存心心存而後可。以復仁體。主客層次正須一一分明。

敬所以存仁之體。恕所以行仁之用。此二字乃爲仁中本有之工夫。豈可謂人心中本無敬恕名目。必對私欲而後有之耶。且謂敬恕以去私欲。然後心存而復仁體。

語氣亦倒。朱子謂從事於敬恕之間而有得焉。則將無已之可克矣。是敬恕以存心。然後私欲可漸磨而去也。蓋克去私欲。以復於禮。其功猛而疾。存心敬恕。以漸去其私。其功順而遲。此正顏冉乾道坤道之所以異處。留良以上章之義。移之此章。失其旨矣。

子貢問政章

呂留良云。按民信之矣。信字聖人原說得較輕。只是民信服於上耳。未指忠信誠信固有之良也。到子貢分三項來問。聖人方講到心德上去。若做上節。即將信字看得深重。則之矣。語氣不合。而三項板煞之病生矣。

言
民信之矣。信字之義。雖只言民信服於上。然尊君親上。亦卽是忠信誠信固有之良。更無二理。如何此處且放輕。到下文乃深重言之也。且此信字雖在兵食之後。然所以必須足食足兵。正爲民信起見。正如言富教二者。富之雖在先。而所重却在教之也。此章重信字之意。雖因後文將三件較量。然後說出。而其實重信之理。已具於首節之中矣。留良意在欲留下節語氣。却移換道理。以遷就之。何其粗也。

棘子成曰。君子質而已矣。章

呂留良云。稽阮以老莊淪晉。金谿以狂禪陷宋。至良知而三矣。流禍一揆。非細故也。

朱子嘗謂子靜精神緊峭。善警發人。能使人旦異而晡不同。其流禍未艾也。朱子雖有此言。然今以當時之事考之。南宋之末。金谿之學未甚行於天下。其門人亦未有居大位操時政者。何因而有陷宋之事。不得以西晉王夷甫諸人爲比也。留良肆口嫚罵。亦妄甚矣。

子張問政章

呂留良云。何以見得子張少仁。其病只在過高。纔過高。便驚外而少實心。且如東坡半山之權謀。伯恭同甫之功利。未嘗不說濟世安民。然議論越高。本心越錯。聽他說話。但有愚弄天下之意。全無誠實愛民之

論
心只此一點意思
早已將仁字剗却

半山之權謀同甫之功利誠有之不必爲古人諱也。至於東坡初年之議論誠有過處。後來所著書裨益於世教者亦多。其偶有偏駁之論爲文妙不自刪去耳。何留良之蔽美而稱惡也。至於伯恭乃朱子之至友如詩傳則多用其說近思錄則相與編次朱子嘗舉之與張南軒同論蓋聖賢之徒也。留良乃敢一例嫚罵可謂無忌憚者矣。至謂有愚弄天下之意全無誠實愛民之心此語以論東坡且不可。况伯恭乎。東坡居官到處有惠政。

無愛民之心而能之乎。同甫雖多偏駁。亦不至全無誠實愛民之心也。留良此等議論。多未見古人之書。而肆口詆訾。多見其狂妄耳。

季康子患盜章

呂留良云上多欲則下行竊。此感應自然之理。若必說因欲而民貧爲盜。是則有此事。然多却轉折與語意不相肖。蓋上導之以欲。則下雖溫飽。皆有盜心。不必使貧而後爲盜也。苟子不欲雖餓死。亦不竊。不必富而後不竊也。如此看語意。更分明緊切。

此章之旨。固重在不欲。蓋夫子爲季康子言如此。若泛論治民之道。自當以厚生爲本。必衣食足而後可驅而

之善也。留良乃云。導之以欲。則下雖溫飽。皆有盜心。不必貧而後爲盜。苟不欲。雖餓死亦不竊。不必富而後不竊。此不過紙上空言耳。天下有此理。有此事耶。且曰。雖餓死亦不竊。所以責於民者如此。豈仁人所忍言哉。留良欲明一章之旨。而他章之旨俱不得通。欲快一處之論。而他處之理更推不去。真迂腐之談也。

呂留良云。不從君民起念。只爲自己利害。康子患處。便是盜心。做官不爲地方計。只爲自己考成。縱諱與捕逐。亦總是盜術。故經濟事功。聖賢都從心上做起。非刻論也。

康子病處。在於有欲。至其患盜。亦情理所當然。何云患

盜處。卽是盜心耶。如此則將聽民爲盜。乃非盜心。有此理乎。又謂做官爲考成起見。則縱諱與捕逐。都是盜術。亦不近情理。夫做官爲地方計者。上也。至爲自己考成。遇盜而捕逐者。有所畏而奉法。論其功效。亦尚可以除盜也。乃以其爲考成起見。而與縱盜諱盜者同科。留良不通世務。固無足道。平日所講是非之理。果安在哉。所謂從心上做起者。道理固當如是耶。

子張問士章

呂留良云。質直而好義三句。逐字平鋪說下。見爲已務實之密。其中並不分輕重。若將義字提出。若前後

言
皆以全此者乃君子義以
爲質章意於此無當也

此章語氣三句平鋪。雖與義以爲質。提出義爲主者有別。但道理一而已。質直好義是根本。察言觀色慮以下人。是接於物之事。輕重自分。卽提出首句爲主。亦無不可。

樊遲從遊於舞雩之下章

呂留良云。只先後處便是崇。不是如是而後乃底於崇也。崇是工夫。不是成效。指示親切。非與二字自見精神。事得俱兼知行說。

崇字雖是工夫。然已兼成效在內。蓋崇之得其道。則德

崇矣。崇之不得其道。則德不崇矣。此崇德字。承上文先事後得。便見是德日進於崇高之意。如何非成效。如上章云。主忠信。徙義崇德也。易大傳曰。利用安身以崇德也。不俱兼成效在內耶。

樊遲問仁章

呂留良云。此章疑辨處。都在知然。其所重者。都在仁。疑知疑其礙仁也。辨知辨其正爲仁也。知原從仁生。而其用乃所以成仁。仁者人也。拈出一人字。便將天下枉直諸衆不仁者。皆包舉在內。人有如許人。仁不欲有如許人。若不知卽不能仁。知不盡亦仁。有不全其不得不知者。乃其所以仁也。

此章首節樊遲兩問。夫子兩答。道理平分。不特未見輕

重之意。連仁知相成之義。亦未之及也。至樊遲未達以
後。乃講出知以成仁之理耳。留良謂此章重仁。雖無大
害。然於此章意義。亦不親切。蓋論道理之歸宿處。則仁
爲重。論工夫之要緊處。則知爲重。此章之仁知。謂之俱
重可也。若言仁包四德。統四端。偏言之仁。亦卽專言之
仁。聖門之教。惟在求仁。則論語一書皆然。非此章之義
獨如此也。

曾子曰君子以文會友章

呂留良云以文會友是講學致知事以友輔仁是取
善誠身事兩者原是一致要之朋友之益只有講辨

切磋餘無可用力則輔仁亦卽文會內見也若將仁字看作大事因緣文字看得粗淺只作語言文字又欲牽併入細求合轉離矣又云人看得上句粗下句情支當不過便寫得上輕下重或且轉而爲側注之局皆因自己所見文字淺小會字浮泛與仁字有內外精粗之別亦從陸王之說以讀書窮理爲務外來也又云講學明道是貼知一邊說取善進德是貼行一邊說知行本是一串事故註雖平分而實未嘗不側注也

講學明道與取善進德雖是一串事而文與仁要不能無內外之分以文會友以友輔仁亦不能無精粗之別且人固有忠孝直諒而不優於文者與之居而觀感愧勵皆足以輔吾仁故子貢問爲仁夫子示以友其士之

仁者。而謂輔仁卽文會內見可乎。而謂朋友之益。只有講辨切磋。餘無所用力可乎。旣詆作文爲側注之局者。又云註雖平分。而實未嘗不側注。則將誰適從乎。

呂留良云。人之所取乎朋友者。專爲明道。易曰。麗澤兌。君子以朋友講習。講學明道。朋友之益。於此爲大。若取善輔仁。反是假借用之。蓋天下道理精微詳悉。非講習不能明。而非朋友則不能講習。若進德修業。只在我自勉之。非他人之所能與。縱有賢師良友。不過爲之資益扶助而已。他人皆注重下句。能不輕放。上句方爲特識。

曾子之意。以輔仁爲重。留良乃云。講學明道。朋友之益。於此爲大。若取善輔仁。反是假借用之。顯與本文相背。

如其言。則友直友諒。不當在友多聞之先。而程子所謂朋友講習。更莫如相觀而善之益多。皆留良所不取矣。其所見實淺。而敢爲異說如此。

子曰誦詩三百章

呂留良云。經以明道。聖人之道。自灑掃進退。至堯舜事業。自喜怒哀樂。未發至聲音笑貌之微。其理一也。故曰體用一源。顯微無間。若謂性命本體爲經學之至。而政事言語爲其次之用。卽分體用內外爲二。非聖人之道。亦非聖人欲人窮經之旨也。以此爲學。縱極講得高妙。吾知其必不能達政。不能專對矣。蓋後世講經學之弊。不出乎此。

南宋以後。言史學者。多重經濟。明季亦然。其宗程朱正

學者。從不聞。但以性命本體。爲經學之至。而以政事言語。爲其次之用者。

子適衛章

呂留良云。問如何富之。曰行井田。問如何教之。曰興學校。此心是實心。此政是實政。舍此雖聖人亦無他具也。

朱子集註。制田里。薄賦斂。以富之。立學校。明禮義。以教之。雙峯饒氏。虛齋蔡氏。發明此義者。不一而足。留良乃設問而自答之。甚矣其汰且欺也。且春秋時。魯作邱甲。鄭作邱賦。井田未廢也。特不能薄賦斂耳。魯作泮宮。鄭

人游於鄉校。學校未廢也。特不能明禮義耳。去薄賦斂。明禮義六字。則三代什一。周官三物。所寓於井田學校之實政。不可得而見。而於夫子當日富之教之之意。亦所謂郢書而燕說矣。

子夏爲莒父宰章

呂留良云。看註云。見小者之爲利。則所就者小而所失者大。大小皆在事理上說。若從利字計較。大小則是見小利。則大利不得。聖人教人於利上求其大者矣。此便是學術義利之分。不可不辨。

聖人告子夏以爲政。所謂利者。豈自私自利之謂。亦以利民爲言耳。利民之利。何諱哉。子曰。因民之所利而利。

之傳曰。天生民而立之君。以利之也。然利民之事無限。聖人之愛人也。非不汲汲求以利之。而有時捐小利而不顧其爲民計者深且遠也。管子爲政。使民莫敢言一朝之便。皆有終歲之計。莫敢有終歲之議。皆有終身之功。霸業尙如此。况聖人之治乎。蓋子夏篤信謹守。而規模狹隘。夫子恐其於利民之事。不爲遠圖。故以是告之。豈分別學術而遏其利心哉。且自私自利之利。不論爲學爲政。何待計較論量於其大小。以爲趨舍哉。

呂留良云。欲速者正爲小見。識無遠大之圖。早上種竹。晚要乘涼。迫窄躁陋。不可以有爲耳。與下見小利。

一例非妄謀大事而失之太急之謂事機之或速或遲必當其時時當先發雖聖人亦未嘗必主退後之理但爲政自有次第不可急遽無序耳聖人不是教子夏遲緩作用後起者勝以退爲進之說也

欲速見小。自是兩件道理。欲速則不達。循序則能達。無論大小事皆然也。見小利則大事不成。能見其大。而後可以成大事。無論眼前事與久長事皆然也。留良將兩件併作一件。亦鶻突之甚矣。

葉公語孔子曰章

呂留良云君與父不同父子從仁中來故不講是非君臣從義中來故專論是非

子之事親也。三諫而不聽。則號泣而隨之。留良以爲不

講是非。謬矣。使父將攘羊。而子知之。必切諫。卽父旣攘羊。而子隱之。仍當委曲懇至。以諭親於道。若置是非於不論。使其父得罪於鄉黨州閭。苟有人心者。忍出此乎。安得爲此害義傷教之說。

子貢問曰。何如斯可謂之士矣。章

呂留良云。首節三句。雖分志才。然使於四方。不辱君命。卽在行。已有恥。中出來有恥。固不是一味審諤。廉介若講到精微處。便是動必合禮。內省不疚也。只完得一箇有恥。以此而使於四方。豈有辱命之羞乎。天下固有能有恥。而未必不辱命者。須知其於本原之地。必有未盡精細融微故也。

動必合禮。內省不疚。此大賢以上幾於聖人者。乃可言。

此。此所謂行已有恥者。尙未到此地位也。至出使不辱。謂其才足以應務。非狷介無能者比。如由求之治賦爲宰。公西華之與賓客言。各有所長。是也。若謂行己中精細融徹。乃能如此。是則體無不具。用無不周之大人也。士品雖高。未易語此。

子曰君子和而不同章

呂留良云。不同。正所以圓足。君子之和。分開有正面反面。合之只成一件。非和之外另有箇不同。亦非外和而內不同。亦非常居時和而辨論時不同。

北宋時韓范上殿爭論事理。一毫不相假借。而下殿不

失和氣。則平居時和。而辨論時不同。君子固有之矣。

子貢問曰。鄉人皆好之章。

呂留良云。謂子貢只以鄉人爲斷。夫子又以鄉人之善不善爲斷。然則鄉人之善不善。又何從定之。是麀邊問鹿。訖無已時也。須知夫子此章之意。只論善與不善。如水炭之不可雜居。薰蕕之不可同器。甚言鄉人皆好皆惡之必無是理耳。縱或有之。則必有阿世之術。詭異之行。其中必有可疑。究竟歸之不善一邊耳。蓋夫子只是於善不善盡頭處看得分曉。故知必無兩存中立之理。子貢於界限處尙看未分明。便疑其或可通融和會耳。

子貢所問。夫子所答。謂人品之未定者也。子貢欲以皆好皆惡決之。而夫子皆謂未可。但就已定之人。以知未

定之人。則人品可定矣。一鄉之中。必有善惡暴著之人。幼同居。長同遊。人之善惡。大槩亦不能掩。留良乃謂鄉人之善不善。又何從定之。至比之麋邊之鹿。蓋欲自伸其曲說。而不知其非物情事理之實也。

克伐怨欲不行焉章

呂留良云。從不行處。合下掃去。便是。故曰。可以爲難。先難後獲。正好從此用力。又云。於四者。但曰不行而已。則其根荄隱伏於中。而天理反強制於外。伏於中者。爲主。制於外者。爲客。以客壓主。其用力甚難。若謂將以久勝之。亦必至使四者內消淨盡。無可行者。而後可言仁。斯亦難信之事矣。豈得謂不行爲爲仁之道盡是哉。

此章之旨。朱子發揮極透。或問云。譬之木焉。不去其根。則枝葉之生。自不能已。此言強制者。不能終不行也。又云。其或能制之終身。不見於外。而其鬱屈不平之氣。乃日鬪進於胸中。則其所謂仁者。亦且殫殘蔽害。而不能以自存矣。此言強制者。雖能終不行。亦不可以爲仁也。蓋顏子明以察其幾。健以致其決。則當下拔去。伸弓主敬行恕。則積久消磨。二者皆除根之藥。而原子只制之不行於外。故夫子不許其仁。是路頭之差。非工夫未到之謂也。留良乃云。從不行處。合下掃去便是。如此則原

子強制之功。乃克已之未純者。夫子但勉之以無倦可矣。何必抑之曰。仁則吾不知耶。又謂可以爲難。卽是先難後獲。正好從此用力。不知此難字。與先難後獲之難。義實有別。此難字在強制上見。先難之難。在克已上見。夫子所以不許其仁。正從此看出他路頭差處。安可將兩難字比而同之也。又謂將以久勝之。亦必使四者內消淨盡。無可行者。而後可言仁。斯亦難信之事。夫使強制之功。果不異於克已。則積久而勝。乃理之必然。又何難信之有。正爲人有形體之累。而又爲氣質之拘。制遏

之功雖日增而克伐怨欲之根亦日長不拔其根則理欲交戰終身未有了期云以久勝之何言之易也。

子曰孟公綽爲趙魏老則優章

呂留良云人皆以廉靜貼優爲短於才貼不可爲吾謂短於才亦是優爲趙魏老廉靜亦是不可爲大夫

公綽廉靜寡欲故優於爲趙魏老短於才故不可爲滕薛大夫此定說也。今云短於才亦是優爲趙魏老則廉靜而有才者反不堪家老之任乎。曰廉靜亦是不可爲大夫則貪躁而有才乃勝其任有才而廉靜者轉不可用乎。留良但欲獨反衆說以誇新奇而不顧義理之安

如此。

子路問成人章

呂留良云大抵負約之人不待久而變也方其言時本非實心則響未寂而中已忘矣久要不忘只在此心上
勘驗

響未寂而中已忘者。面是背非之小人也。何足復論。凡人之不能踐約者。當其要約時。未必不出於誠心。及其久也。時異勢殊。變其初心。故不能保其始終不易耳。故久要重在久字。久而不忘。乃見誠信有守。而可爲成人之事。太淺看不得。

子路曰桓公殺公子糾章

呂留良云春秋時凡公子皆各有傳有變難則其傳與臣僕竭忠爲之謀入亦例也

其傳與臣僕雖各忠其主然亦須論道理苟非當立則宜安分豈有例也。

子貢曰管仲非仁者與章

呂留良云一部春秋大義尤有大於君臣之倫爲域中第一事者故管仲可以不死耳原是論節義之大小不是論功名也

域中之義莫大於君臣孔子所以嘉管仲之功而不責

以匹夫之小諒者。正爲君臣之大義也。朱子曰。楚地最廣。極強大。齊晉若不更霸。楚必吞周而有天下。蓋自熊渠得江漢間民和。首棄周天子之命號。而立其三子。皆爲王。至於熊通。併吞小國。漢陽諸姬。楚實盡之。宣王中興。雖復文武之境土。而終不能服楚也。至於熊賁。開地千里。滅鄧。敗蔡。而執其君。至於熊頹。旣服陳蔡。數加兵於鄭。蓋陳蔡畿南之藩蔽。而鄭則畿內之懿親。周之東遷。所依以立國也。觀其情勢。鄭服之後。不至於吞周。以併諸夏不止。自管仲相桓公。撫循魯宋。陳衛。曹許。數合。

諸侯以致勤於鄭。經營二十餘年。然後聲罪致討於陘亭。楚人帖服受盟。於是天下諸侯皆凜然知天子之尊。王禁明而王臣不下聘者六十年。侯度肅而諸侯無私爭者三十載。其後晉文繼起。踵桓之事。因以勤王號召諸侯。君臣之大義復明於天下。孔子所謂一匡天下。民到於今受其賜者。此也。且管仲子糾之傳耳。諸侯之羣公子皆有傳。公子之傳之私義。其不敵天下君臣之大義明矣。孔子嘉管仲之功。正所以伸君臣之大義也。而留良乃云更有大於君臣者。豈非譏語。

公叔文子之臣大夫僎章

呂留良云可如制可之可下來似活動却是一定之斷孰可之孔子可之也孔子如何得可之從天理可之也此便是春秋天子之事

孔子偶聞文子薦僎而謂卽此一事可以爲文聖人垂世立教何處不然乃忽援制曰可之可以爲義以證春秋天子之事謬悠甚矣

子曰古之學者爲己章

呂留良云爲人者欲見知於人則爲人卽希世驚名之謂非經世利物之謂也經世利物亦是爲己中事朱子曰學者視天下事以爲己事之所當然而爲之則

雖甲兵錢穀籩豆有司之事皆爲已也。以爲可以求知於世而爲之。則雖割股廬墓。敝車羸馬。亦爲人耳。可謂深切著明矣。留良不直引之。而更易以爲已說。何也。

子曰不逆詐章

呂留良云。若於不信下頓住。另作波折。以取抑亦便似一反一正。做成兩橛矣。須一氣直下。抑亦似轉不轉。其著力不在過接處。又云。兩不字與抑亦雖若有停折。却只一氣直下。要有體會。又云。此章重在下半截。抑亦正須重頓。謂全題當一氣讀下。不作轉折者非矣。

前一說與後一說顯然相背。要之此章之旨。須作轉折者爲是一氣直下。本留良之謬說耳。

呂留良云三句都是誠亦都是明分貼不得然學者做工夫於誠明二字宜如何曰誠明只是一件誠則明矣明則誠矣若論學者所以靠用逆億與不能先覺之故只坐見理不明其欠工夫在窮理格物有所未至則明之一邊更為學者喫緊用力處

不逆億是誠先覺是明分貼不易但就二者論之不逆億在前則謂先覺中帶得誠字之意猶可至謂不逆億是明而與中庸誠則明矣之義相牽合則支離而失其本指矣又謂明之一邊更為學者喫緊用力處亦非也格物窮理亦須立誠以格之此主敬所以通貫八條目也若專以明為事則世人固有料事多中不謂不明而

立心私邪。專以逆億爲能者。其害不小。重明而不重誠。豈可以立教哉。

呂留良云。震川文云。定其心而不以物勝。此釋氏之覺。非先覺也。又云。震川謂虛中無我。以待天下之至而我無與其間。此皆從明道定性書得旨。然極處尚有未盡。以先覺止以心爲極也。問覺緣何不是心。曰。所以覺者。非心之故。

所以覺者。非心之故。語甚鶻突。留良之意。不過謂言心而不及理。覺字恐無把柄耳。不知心之所以能覺者。自由理之明。無待於推原也。孔子曰。清明在躬。志氣如神。周子曰。靜虛則明。明則通。張子曰。虛明照鑒。神之明也。

蓋惟聖賢之心。至虛至明。與理爲一。故能物來坐照。無假推測。使心有所蔽。而惟於事物上擬度。則羣疑滿腹。安能先覺。孔子周子張子所言。正此章先覺之義。皆直指心體。而理自具其中。留良乃謂所以覺者非心之故。獨不思舍心則理安所託。覺字之名義。安所指乎。

或曰以德報怨章

呂留良云莫道或人此論是些小弊病。釋老之學亦是如此。老氏只講以退爲進。逍遙齊物。也是此意。至於釋氏則竟看得父母兄弟原與昆蟲草木一般。愛無差等。亦何異於此耶。總之異端只是私心。聖賢只是天理。私心之論縱裝束得極好。被天理一駁便粉碎。蓋所謂天理者。正如秤之星。如尺之寸。一毫那移。

走趨不得纔得箇四平八穩耳

集註或人所稱見老子書又或問以德報怨亦可謂忠且厚矣而夫子不許何哉朱子曰是私意所爲非天理之正也留良蓋竊此意而爲之說者但此惟老子有之而混及莊釋莊釋之書無以德報怨意

子曰上好禮章

呂留良云禮所以辨上下定民志只是尊卑等威事分明明民便知尊君親上之義故易使耳謂以禮使民者固非謂上自好禮而民感動易使者亦非蓋天高地下萬物散殊凡一名一物一動一靜莫非禮也惟上能好之則事事辨其數制物物辨其等分犁然當心樂此不疲而禮制大明達於上下民之易使固

其宜也

辨上下。定民志。則民易使固矣。然徒事事辨其數制。物物辨其等分。而上不好禮。則無以感動其善心。而使之實知尊君親上之義。故二者皆易使之正解。而使民感動之義。尤與好字相關切。留良乃強生分別。以上自好禮。而使民感動之說。爲非易使之義。殊不可曉。

子路問君子章

呂留良云。近人講下二段。只曉得人與百姓分別。似只一修己。便隨地安去。不知安人安百姓。其修己工夫。充積步步不同。

朱子曰。修己以敬。語雖至約。而所以齊家治國平天下之本。舉積諸此。子路不喻。而少其言。於是告以安人安百姓之說。然則充積道理。已包舉在修己以敬內。安人安百姓。特以自然及物之功效告之耳。若如留良所云。則修己以敬。未是徹上徹下道理。直到安人安百姓。步步有一著。充積工夫。似夫子當日竟留餘義。以待子路之問矣。其說之背謬若是。

子曰。賜也。女以予爲多學而識之者與。章。

呂留良云。一貫不主知說。而泛拈心字。與曾子章無別說。此章之理病也。

二章各別者。曾子章以行言。此章以知言也。而其所以相通者。聖人之心。渾然一理也。惟其一理。故多學而識。只一理以貫之。隨事精察力行。亦一理以貫之。所貫不同。而其所以貫之者。無不同也。留良由不知聖人之心。渾然一理。原不因知行而有異。故但知二章之各別。而不知二章之未始不相通也。乃但以泛拈心字。同於曾子章爲病。此皆俗儒講究時文之法。於聖賢義理之學。全未窺見。

呂留良云。將一看成另外一物。要得此把柄到手。多與不多。皆妙。一立學識。先一入學識。中正是禪悟。非

言
儒理也。儒理先須分別義理。曾子章一貫話頭攪入此章不得。或曰既云一貫。豈兩章有二致乎。曰公此見便是和尚且耐心看細註去。

一立乎學識之先者。道理之本體也。聖人之渾然一理是也。一入乎學識之中者。道理之大用也。聖人之泛應曲當是也。先儒論太極立乎陰陽之先。行乎陰陽之中。卽此理也。若禪悟則說一說多且不許。況有先後中邊之云乎。又曾子章與此章雖分知行。所謂一者則不異。或謂兩章無二致。其言亦不全非。留良以爲和尚之見。謬哉。

呂留良云近來講學無非套竊禪門緒餘借儒家言語做箇話頭爲文章翻案之法原不曾識得儒家言語在此之所謂一貫者只是本天彼之所謂一貫者只是本心本天則有一定之工夫一定之火候本心只一了萬了更何工夫火候之有耶故同舉箇一貫字其實如冰炭之不同不可不明辯也

聖學雖有工夫火候然遲速亦存乎其人如顏子三十而入聖曾子二十而聞一貫亦何可以一定限之。禪學雖有言下解悟者然亦有坐破七蒲團而未悟者何嘗有一定之工夫火候留良不知道術之異不在工夫火候上論如播種而耰之經春涉夏至於日至之時而後熟凡物皆同而其爲稻爲粱爲稷爲黍則不同也。

呂留良云謝顯道博舉史書程子謂其玩物喪志謝
聞悚然及看明道讀史却又逐行看過不差一字謝
初不服後來省悟却將此事做話頭接引博學之士
須知夫子此箇話頭正從實地接引耳如以學識爲
敲門之磚以一貫爲密室之帕皆狐禪矣若問曰一
以貫之如何應對曰多學而識之可也 又云聖人
之一卽在多學而識處舍却學識貫箇甚麼朱子之
言真聖人精髓凡爲先一貫而後學識之論者卽爲
邪禪所陷溺
入德之賊也

留良云有問一貫者但告以多學而識之而已渠意蓋
以一卽在多學而識處卽襲後段所引朱子之說也不
知朱子乃謂一之貫卽貫此多非卽以多爲一也聖門
之教本末先後固自有序然下學工夫亦自有本有末

聖人何嘗教人逐末而忘本耶。孟子曰。先立乎其大者。亦是下學之事。豈待積學力行之後。然後養其大體耶。伊川好學論曰。必先明諸心。知所往。然後力行以求至。朱子求放心節註云。蓋能如是。則志氣清明。義理昭著。而可以上達。不然。則昏昧放逸。雖曰從事於學。終不能有所發明矣。夫必明諸心。而後力行以求至。必先收放心。學問乃有益。是皆爲學人言之也。曾子告門人以忠恕。忠卽是一。恕卽是貫。無忠做恕不出。學者之忠恕。卽聖人之一貫也。如留良言。曾子何不告門人以積學篤

行耶。程子謂謝上蔡玩物喪志及讀史却又逐行看過謝後來省悟將此事作話頭接引博學之士所謂接引者謂引博學者使返求於內也留良乃援爲重多學之證則惑之甚已。

子貢問爲仁章

呂留良云事友與爲仁爲仁與仁字有層次無內外也

事友分誼之接於人者也爲仁工夫之存乎己者也事友以爲仁事雖相關然事友在外爲仁在內安可謂無內外至於仁者理也爲仁者人也理具於人以人弘道

固無內外之可分。亦無層次之可言矣。

顏淵問爲邦章

呂留良云。艾南英謂此四句有二義。一則斟酌前代舉一以槩其餘。非止夏時殷輅周冕也。一則本一人之心。建中和之極。不但法制禮樂等也。總看得此四句粗淺。要於上面別見箇精微廣大之道。不知夫子語顏子與他人不同。程子曰。問政多矣。惟顏子告之以此。正謂卽此是精微廣大盡處耳。若僅以法制禮樂觀誰不可語。而反以之告顏子耶。

朱子明謂顏子於爲邦大本原頭。已是會得不須更說。故惟舉四代制度所當斟酌而行者告之。如艾說。則須增益於聖言之外。方是此章本指。固爲添設。如留良說。

則不見得顏子已會本原一層。而夫子所以立言之意。亦失之矣。且註中引程子一條詞意極分曉。不引全文。而截取兩言以就已說。何也。

子曰躬自厚而薄責於人章

呂留良云躬自厚而薄責於人。纔是至公。蓋在我者。此心所以不得不厚期於人者。只此事所以不得不薄。若云以聖賢自待。而以不肖待人。則是不責。非薄責。終是物我看作兩件。亦偏陂之論也。

留良謂在我者。此心故不得不厚期於人者。只此事。故不得不薄。以心與事判厚薄。非知理者也。蓋在心有精粗之分。而在事亦有難易之殊。設如有人焉。責之已者。

曰。吾善吾心而已。事之得失。可不計也。責之人者。曰。吾不責其心。而事事求全。責備焉。以此爲躬自厚而薄責於人。可乎。又謂不責人者。爲物我看作兩件。語似是而亦未穩。仁者以天地萬物爲一體。人已固非二物。然論處物之義。則待已待人。固當有別。如遇尊名美利。則當先人而自處於後。至有克己難行之事。則當自厚而薄責於人。此乃性分中自然之分制也。豈判人已爲二物之謂哉。

子曰。君子義以爲質。章

呂留良云四句只是一事三之字却指義以爲質
又云若三之字專指事則四件並列無分且云孫以
出事更說不去矣固不若都指第一句爲得也 又
云信成言徹始徹終必以信成字粘定信上說卽中
庸所謂誠者物之終始不誠無物易所謂貞固足以
幹事也若曰成義義成則似義至此方成非正解矣
通章以義爲主信以成之成此義也謂成之之字內兼
禮孫則可謂非至此而後成則不可留良旣云三之字
俱指義以爲質而又云成字粘定信上說謂義到此方
成者爲非其自相矛盾乃至於此且成字旣粘定信上
說矣則此之字更作何着落耶

子曰君子不以言舉人章

陳際泰文云。君子於此有去取之權焉。今日不以言舉人。卽今日不以人廢言者也。留良評云。兩句是平說。有兩項事。有各種人物。如何側併做一個人。一串事。得生薑樹上生。却被他說得好聽。但當不得明理者。磕着粉碎耳。

用人聽言。固是兩項事。但併做一箇人。一串事。理亦可通。於此有人焉。其言善也。其品行則未必善也。君子於此。固不以其言之善。而遂舉用其人也。亦不以人之未善。而廢其言之可采也。要之用人聽言。兩邊道理。旣講得明。則分爲兩人。合爲一人。無所不可。何至如生薑樹上生之云哉。

子貢問曰。有一言而可以終身行之者乎。章

呂留良云。時解恕字動云。求之一心而已。不知心字如何切貼。恕字寬泛不切。猶其小者也不知此說正。墮釋氏本心之教。憑他說仁說敬說忠說恕。我只以心字了之。黃梅云。憑他非心非佛。我只是。卽心卽佛。其病中讀書人學問心術間爲害不小。故凡以心學爲聖學者。卽禪學也。

留良每以言心爲大戒。詆爲禪學。不知唐虞授受首言人心道心。大學聖經以正心誠意爲樞紐。仁敬忠恕道心也。不仁不敬不忠不恕者。則人心之流也。卽以此章論之。施其所欲。勿施其所不欲。正所以遏人心而存道心也。安得以求之一心爲時人罪哉。

子曰知及之章

呂留良云。泛論學者做工夫。自當以知及仁守爲重。至於此章。論聖學王道到盡善盡美處。正在細節小疵上較量分毫。如造九層之塔。到頂尖處。更不可不完美耳。定要以仁守爲重。便失此章之旨。凡聖人言語。各有所當。一槩將儻侗道理。武斷不得。且此章正論輕。並不論重。正爲莊蒞動禮一節。輕似一節。所以更不可忽也。只將首節頓斷遞次落下。兩節章意自見分明。

朱子曰。此一章當以仁字爲重。知及之。所以求吾仁。蒞之動之。所以持養吾仁。觀此。則留良所云。定要以仁守爲重。便失此章之旨者。非明悖朱子之說乎。

師冕見章

呂留良云有人道當然有天道自然有人物不知其然而然雖皆窺其微攬其勝而於聖人裁成輔相充極細微推達鴻廓無不恰盡其所以然處不能有所發明此一層不到下面數層都落空去走入漆園瞿曇兩家門下而不知矣

留良所謂人道當然天道自然人物不知其然而然此道理之本體也。所謂裁成輔相充極細微推達鴻廓無不恰盡其所以然處此聖人盡道之事也。二者理則一而事亦相通。孔子五十而知天命。中庸曰質諸鬼神而無疑。知天也。百世以俟聖人而不惑。知人也。學至於此方可謂於人道當然天道自然皆窺其微而攬其勝矣。

烏有如此之人。而於聖人之裁成輔相。巨細不遺處。尚不能有所發明者乎。苟於聖人之道。未能有所發明。則是學之未至也。如此之人。而乃能明人倫。知天道。窮物理。皆窺其微而攬其勝。世亦未之見也。大抵留良之誤。在於以天理爲空。以人事爲實。意謂識其理之本然。不若見之行事之深切著明耳。此皆學不識本。強生意見。知道者必不然也。且漆園瞿曇之道。與聖賢異者。不待見之行事。其說理處原不同。今有人焉。於聖人所謂人道。天道。物理。皆窺其微而攬其勝。却走入漆園瞿曇兩

家門下。則是種稻麥之種。而生桃李之實。無此事矣。

呂留良云。無心出之而自然中道者。聖人也。以處物之義自在吾心也。有心爲之而庶幾其合道者。學者也。以在物之理。仍求之。是物也。

在物之理。處物之義。無二道也。知在物之理。則知處物之義矣。盡處物之義者。以其明在物之理也。聖人學者之分。只爭至與不至。若曰洞見在物之理。曲盡處物之義者。聖人也。窮究在物之理。講求處物之義者。學者也。則得之矣。今留良以處物之義屬聖人。以在物之理屬學者。殊不可曉。孟子之答任人。禮與食色之輕重。此非

言處物之義耶。而以之教學者何也。程子謂夫子之老
安少懷。如羈馬之生。由於馬。物各付物而已。此非言在
物之理耶。而以之論聖人何也。

孔子曰天下有道章

呂留良云。自天子出之禮樂。征伐與自諸侯大夫出
之禮樂。征伐固自不同。亦隨道爲邪正盛衰。蓋禮樂
征伐者。道之用。
非卽道在是也。

道者。天理所發著。事物之準則。凡離道與物而二之者。
皆末學之失也。留良乃云。禮樂征伐者。道之用。非卽道
在是也。悖矣。道之在禮樂者。施之有其等。用之有其地。

行之中其節是也。道之在征伐者。施之當其罪。舉之以其時。行之得其制是也。今謂禮樂征伐之外。別有一道。而禮樂征伐乃其用。是離禮樂征伐與道而二之也。如謂建中和之極。協剛柔之德者。乃其本。而禮樂征伐乃其用。是別爲一義。而非此章之旨也。於道之本體。及夫子立言之意。胥失之矣。

孔子曰益者三樂章

呂留良云。樂於禮樂。直是膠黏不上。此當從樂字中看出。禮樂來。若只鋪排禮樂。而以節字膠黏之。乃以樂字膠黏之。宜其不上也。其病總看得禮樂粗淺。

此句總要看得禮樂卽是中和之理。節之卽是調理性情之事。則樂之莫非身心之益矣。苟得此意。則從樂字看出禮樂來亦可。先說節禮樂。而以樂字膠黏之亦可。順逆說來。有何妨礙。若禮樂字看得粗淺。則雖從樂字說到禮樂來。亦祇是玉帛之交錯。鐘鼓之鏗鏘而已。何與中和性情之事。所爭者存乎所見之是與不是。不在乎說彼說此之先後也。留良開口便云樂與禮樂直是膠黏不上。是自看得禮樂粗淺矣。何與人事。

子曰性相近也章

呂留良云。習於善則善。習於惡則惡。習非教術學問也。故有罪亦可有功。若專以教術學問言而謂其功大。則當云性相近。習相一矣。豈得云遠哉。及至說來。又似有習而性失其故者。然則其以教術學問爲習者。乃正深惡教術學問而終以無善無惡爲本體耳。又云。習非教之謂也。天有運氣。地有方隅。物有異用。事有殊因。人習於善則善。習於惡則惡。而至於相遠。然後聖人立之教。教所以化其習。使復還於相近也。若以詩書禮樂化教勸率爲習。然則聖人之教。豈使人相遠者哉。

習相遠也。此習字。兼風氣之漸染。及教之善不善。俱在內。此相遠字。亦兼中人。或上或下。及聖益聖。愚益愚。俱在內。所以下文接云。惟上智與下愚不移。方有力。其上者。雖惡人與居。不能使之變。其下者。雖聖人與居。不能

化而入也。是之謂不移。不移。自教後而言。不自未教之前言也。且習相遠也。習字。卽兼教在內。則中人固有因教而善。因無教而惡。益以見教之不可以已。何等關係。何故此處不可入教字在內耶。

子張問仁於孔子章

呂留良云。時文鵠盧提在首句。便錯。能行五者是存心之功。於天下則心存爲仁矣。方是理得。時文將五者作理。以仁作心。或以能行屬心。五者屬理。或以五者爲心。仁爲理。或以能行貼心存於天下。貼理得盡。是醉夢中吟嚙。

朱子集註。行是五者。則心存而理得。於天下言無適而

不然。無適不然。謂心無在而不存。理無在而不得也。留
良乃云。能行五者。是存心之功。於天下。則心存爲仁矣。
方是理得。其割裂文義。乃至於此。能行五者於天下。本
一句讀。朱子所以分兩截解者。恐學者誤認於天下爲
鋪張事功之詞。故曰無適不然。以見其爲存心之密。循
理之篤耳。如何謂能行五者。方是存心。至於天下而心
乃存耶。心存理得。只是一事。如何謂能行五者於天下。
是心存之事。至爲仁矣。乃理得之事耶。朱子之意。以心
存而理得。則可以爲仁。如留良之說。則能行五者於天

下之外。尚別有所爲理得之事。可乎。不可乎。且曰能行。則不獨心能存。理亦能得。彰彰矣。而強判爲存心之事。豈惟失朱子之意。於本文亦刺謬矣。總之留良看心字。不明。以爲虛空之物。恐心存尚不足以爲仁。故支離若此。

子謂伯魚曰章

呂留良云此與匡衡關雎之說理一而語意不同彼自近處推到遠處去此要自遠處收到近處來只在閨門衽席日用平常之間疏發義理方與牆面之意更相關切

匡衡言關雎爲王教之端是自近處推到遠處此章言

二南爲學者修身齊家之要。方白近處做起。並無從遠處收來之意。

齊人歸女樂章

呂留良云。女樂歸定公。則受之者定公也。而特書季桓子。孔子之得政也。以桓子其去也。以桓子魯之不足。以有爲桓子之不足。以有爲也。

魯自成襄以來。政歸季氏。沙隨之役。成公在會。而執季孫行父。以非執季孫。不能得魯之要領。而成公不足爲輕重也。邢邱之役。襄公在晉。而季孫宿卽事於會。以必季孫受命。職貢始有憑。而襄公不足爲有無也。昭公旣

孫於齊。而魯於列國之邦交。不異於常。諸侯惟知有季
孫久矣。況定公之世乎。齊歸女樂。桓子不受。定公不能
使之受也。桓子受之。定公不能使之不受也。如書定公
受之。則失事之實。爲權臣諱。而歸過於君。有是理乎。留
良乃云。受之者定公也。而特書季桓子。若以是爲記者
之深文。謬矣。

長沮桀溺章

呂留良云。聖人易天下之心。卽天心也。直立在用舍
行藏之外。不在時勢。不在一身出處。亦不在做得成
做不成上。發意當時。沮溺一流。總不見得此理。不能
有得此心。遂成一種議論。流爲後世二氏心腸學術。

沮溺與二氏心腸學術絕不相同。必欲牽合。徒見其支離耳。

子夏曰博學而篤志章

呂留良云四件只說致知之事而仁在其中註中心不外馳二句是講出所以在中之義非子夏語中所
有故吾謂仁字尚可提唱心字不可提唱也如云人
知力行所以爲仁不知致知而仁亦在中於理甚當
故仁可提唱也若云治心求心是要存心而如是非
如是而心存於理顛倒故心不可提唱也蓋心字是
四件與仁交接過渡處說在一邊不得謂
四件是存心旣謬謂心存卽仁亦非也

朱子曰從事於此四者則心不外馳而所存自熟故曰
仁在其中矣留良乃云謂四件是存心旣謬謂心存卽

仁亦非也。是顯悖朱子之說矣。朱子謂從事於此則心不外馳。豈非以四者卽所以存心乎。謂心不外馳而所存自熟。故曰仁存其中矣。豈非心存卽仁乎。留良之說不獨與朱子悖。孟子曰。學問之道無他。求其放心而已矣。留良乃云。心字是四件與仁交接過渡處。是以心爲空虛之物。旣離學問思辨於心而二之。復離心於仁而二之也。總由看心字不明。不知心者衆理畢具。心存則理存。而謂心之存尚不足以爲仁。充其說必別求道理安放於心。而後可以爲仁也。其於告子外義之學所趨

不同而所見之誤則同。不可以不察也。

子游曰子夏之門人小子章

呂留良云陳子龍文云子游之爲學清虛簡直近於聖人之道子夏之爲學詳盡篤實近於聖人之教子謂夫子之後遭戰國之亂暴秦之災至教已無存者止子夏子貢子游之門人流傳經說餘緒然多假託傳會不可考矣至宋程朱諸子出而聖道復明本末具在直接不傳之微言非子夏等之所得與也子游當時無所傳亦無門人著述豈得以清虛冥悟之學誣之哉

推尊程朱而貶及游夏之門人又泯沒傳經諸儒之功何其妄也伊川誌明道之壙謂先生之學返求之六經而後得之墓碑又云先生生乎千四百年之後得不傳

之學於遺經。然則程朱之所以紹聞知之緒者。以遺經之存。先聖之微言大義未泯也。傳經者。雖師友淵源所漸有淺深。或源遠末分。不無粹駁。然聖道賴以不墮。一髮引千鈞。厥功偉矣。諸經多傳於子夏之門人。詩序易傳。雖難信。而春秋儀禮傳。頗具微言。至於蜡賓出遊。子游與夫子問答者。精理奧義。與大學中庸相表裏。其他散見於論禮者。剖抉精蘊。獨契聖人之意。所得於親受者多矣。而敢於一概抹去。多見其不知量也。

子夏曰仕而優則學章

呂留良云兩句文法雖同須分別看乃佳下句而字重則字緩與上句正相反兩優字亦別上優易下優難如此方見聖賢內重外輕窮達一致之理

聖賢垂訓語各有當不必一轍如漆雕開章子路使子羔爲費宰章專爲學未足者未可以言仕也此章言仕必優而後可兼於學學必優而後可出而仕統爲專於所務言也以彼概此則鵲突而失其理矣又謂上優易下優難亦是強生分別學之優也固不易仕之優也無論責任之大小必使物各得其理而後可以言優是豈可易而言之耶又引內重外輕以爲証亦非是內重外

輕者。如孟子言不願文繡膏粱。周子言銖視軒冕。塵視金玉云耳。乃身外之物也。若此章之言仕。乃事君之義。澤物之仁。性分中之事也。大學以明德爲本。新民爲末。以先後言則可矣。今以內重外輕爲言。豈非引喻失義耶。

衛公孫朝章

呂留良云。遵傳註莫患乎知其當然而不知其所以然。終於可遵可畔無一定不易之理。此異端與訓詁同歸於無得也。如此章道字。獨註作謨。訓功烈。禮樂文章人皆知之矣。然試問堯舜以來相傳之道。夫子獨不學乎。論道體不容分大小。賢不賢矣。然道兼精粗。上下獨不可以之分大小。賢不賢乎。文武之道。卽

堯舜之道列聖道統傳文武文武道統傳孔子豈堯
舜列聖之道皆止於謨烈禮文而孔子之得統專在
斯乎抑列聖之道更有別傳乎此陋儒定以爲疑者
也然則道之註爲謨烈禮文亦朱子之見如此而非
不可易也生薑樹上生也只得依他說耳以此爲遵
畔乎不畔乎蓋此章文武之道四字全要低看公孫
問仲尼何師而爲仲尼子貢謂仲尼無須師無可師
列聖大道天縱之所固有也若仲尼要由師而得者
除非是典故名物之類如文武之道亦須問人然則
人人可爲仲尼之師究竟何常師之有文武之道猶
云國朝典故名物四字折開不得如此看便分明愈
見朱註之不可易矣今人先要擡高文武之道大意
已失種種俗病由此而生雖硬差排幾箇謨訓功
烈禮樂文章字面以裝點道字曾何當於傳註哉

此章留良辨論甚多總之謂文武之道道字全要低看
如典故名物之云耳至於文武之所傳與夫子所得統

於文武者。有向上事在。全不在此。此似是而非也。文武之道。朱子所說。謨訓功烈。禮樂文章。正不可看作粗淺。蓋聖人之心。全體天理。其發爲禮樂文章者。皆自聖性流出。盡倫盡制。張子曰。禮儀三百。威儀三千。無一物而非仁也。仲尼之心志。與文武相通。明其數。便知其意。習其事。便通其理。夫子之傳文武之道。固不僅度數之末。亦非於謨訓功烈。禮樂文章之外。別有所爲。聞而知之也。中庸曰。憲章文武。子畏於匡。亦曰。文王旣沒。文不在茲乎。是道卽文。文卽道。非二物也。留良每每隔精粗爲

二致。內外爲二本。故其謬如此。

呂留良云大意祇問孔子何師答曰無師云爾文武之道數句是子貢反跌文法正決言其無所從學也又云道字不重者只爲此道字指昭代典故若云除非此等孔子也須問人耳

此章須說夫子無所不學。無所不師。方見聖人之大。如舜之好問好察。包羅宇宙。物無大小。一入聖人之心。莫非至理。況文武之道。事事皆要道精義之存。夫子無不學。無非師。所以爲聖人也。留良識見狹陋。以爲聖人有師。便減聖人身分。必言無師而後快。豈不謬乎。子貢開口。便說文武之道。未墜於地。何等鄭重。何等關係。然則

夫子所得於識大識小者。卽所以紹文武之傳。並非二事。留良乃認作反跌語氣。若云除此等聖人須問人。過此則不須問人矣。以証其無師之說。豈不與子貢之本意大相悖也哉。

堯曰咨章

呂留良云。陳子龍寬則得衆。節文云。帝王者善審天下之人情。而有以致之。予謂義亦無他。只如此來。便入私心權術。而寬信敏公之本。皆僞妄矣。

此言非特斥陳文之僞妄。幾於疑本文之僞妄矣。夫子曰。人情者。聖王之田也。人情以爲田。故人以爲奧。大學

言
曰。民之所好好之。民之所惡惡之。孟子所欲與之聚之。
所惡勿施爾也。皆謂審天下人情所在。而有以致之也。
孔子曾子孟子之言。豈亦權術私心耶。有感必有應。自
是民之秉彝。王政之行。其得衆。其人任。其有功。其民悅
皆是分內事。留良每遇此等處。必指以爲涉於功利而
痛詆之。故於天下歸仁。天下歸心。邦家必達。邦家無怨。
凡以功效言者。必曲爲攻駁。亦悖甚矣。

子曰不知命章

呂留良云。天卽理也。命卽天理之當然也。知理之當
然。一切生死禍福成敗利鈍。一齊放下。面前只有我。

所當爲之事在更有何商量夾帶故可以爲君子佛氏以因果報應勸人袁黃竊其旨造爲功過格謂足以改命乃所謂不知命也

朱子曰此與五十知天命不同知天命謂知其理之所自來此不知命是說死生壽夭貧富貴賤之命蓋命有端以理言者天命之謂性五十而知天命是也有以氣言者孔子言道之將行將廢得之不得曰有命是也留良乃謂命卽天理之當然。是明與朱子之說背矣。又自知其說之不可通而曰知理之當然。一切死生禍福成敗利鈍一齊放下。以牽合其說而混其義。不知何意。

